

重修兩淮鹽法志

兩淮鹽法志卷四

王制門

制詔四

道光十二年三月初四日內閣奉

上諭前據御史卞士雲奏江蘇淮揚所屬下游州縣向有私梟
勾結船船載運私鹽設立馬頭銷售並有囤戶過載架護名
目當交陶澍等嚴行查辦茲據奏淮揚各屬上年被水成災
窮民乘坐船船四出乞食閒有稍帶鹽斤偷賣餬口梟匪乘
機誘雇內載私鹽外坐婦女裝點災民計圖偷越經該督等
飭屬巡拏前後獲犯四百三十餘名私鹽六十九萬餘斤並

訪獲包攬艍船各犯嚴加懲辦私鹽失所倚賴咸知儆惕至
觀音門近在省城並無梟匪設立馬頭暨囤戶過載等名目
等語此項艍船窮民乘坐捕魚覓食行蹤無定梟匪勾結載
私實於鹺務大有關繫嗣後著做照沿江魚船之例將船戶
姓名籍貫年貌及男婦大小口數查明填給印牌懸挂艍口
以便稽覈該督撫等仍當督飭各屬認真查察有犯卽懲以
杜梟私而肅鹺政欽此

道光十二年四月十一日內閣奉

上諭據戶部奏自道光十年分以來陸續撥給各省軍需賑恤
河工各項銀兩加以被災省分緩免錢糧並兩淮短徵鹽課

統計一二年間多出少入已逾二千餘萬兩雖見在酌撥尙無支絀惟不能不先事豫防寬爲籌備等語國家經費有常自宜加意節用量入爲出著各督撫責成各藩司於一切工程河工及各項借墊雜支銀兩務須大加撙節覈實動用毋得任意開銷至各該省經徵錢糧總須認真督催按期撥解並將上年該部奏准飭催之節年未完積欠及咨催各項應解未解銀兩迅速趕緊催徵完報分別入撥解部經此次降旨後儻再催徵不力仍前延宕該督撫卽將該藩司及徵收各員據實嚴參按律懲辦若完報入撥後或爲數短絀著戶部卽將該督撫指參懲處決不寬貸將此通諭知之欽此

道光十二年四月三十日內閣奉

上諭陶澍奏查禁回空軍船夾帶私鹽並嚴堵川私潞私一摺
各省軍船回空沿途裝載私鹽侵銷引地最爲淮綱之害上
年節次降旨飭令經過各省督撫漕督鹽政諸臣督飭所屬
節節盤查嚴防偷漏糧私得就肅清本年軍船北上轉瞬回
空誠恐夾帶之風息而復起於兩淮綱食各岸大有關繫著
直隸總督山東巡撫長蘆鹽政嚴飭各屬於軍船經過之處
仍照上屆章程嚴密稽查不准私鹽售賣上船如有土梟風
客囤積鹽斤跟幫上載務卽訪拏究治並著漕運總督嚴諭
押空員弁隨時防範遇有私帶鹽斤立卽起除淨盡並治以

應得之罪儻該員弁等不能實力查禁抑或有心徇庇卽行嚴加參處至潞私由河南南陽等府充斥襄樊下游安陸荆門胥被侵灌川私由夔關而下直達宜昌荆州尤爲楚岸大害自應認真堵截俾淮引得以疏銷著四川總督河南巡撫嚴飭夔州南陽各府於各境內實力認真查禁勿任偷越並著湖廣督撫選派明幹文武員弁分投於川豫接壤要隘堵截查拏以靖私源而利官運欽此

道光十二年五月十三日內閣奉

上諭給事中邵正笏奏兩淮船板等船私鹽侵害浙饒請飭妥議章程協力堵緝一摺據稱江省常州鎮江等府毘連大江

爲浙西引鹽門戶順治年間於京口地方設立官廳盤驗鹽船嚴拏夾帶私鹽立法至善乃日久視爲具文兵役得規故縱以致浙西引地紕銷兼之上年江省奏開沿江孟瀆德勝澡港三河便於舟楫往來卽有江北梟徒駕駛舢板黑魚腮船裝載私鹽絡繹進口更有地方棍徒勾引招接私設稱手行家到處販賣一遇官役查拏冒稱災民肆行強橫反向官鹽商鋪索詐搶奪因此商無轉輸店多閉歇始於常鎮兩府蔓延蘇州松江太倉各屬浙西引地自上年七月以來缺銷十餘萬引紕課四十餘萬兩且三河對峙淮鹽呂四等場梟販片帆飛渡尤爲便捷請飭江浙文武大員會同覈議等語

著陶澍程祖洛林則徐富呢揚阿悉心妥議或照京口盤鹽廳之例在於沿江隘口移駐一二員弁專司盤驗或於三河之中酌擇一河通行舟楫其餘二河以及支港概釘木柵不准通舟或修建閘座派委妥員司其啟閉以資捍禦此外如鎮屬丹徒丹陽各口濱臨大江淮私直達亦著籌畫堵截章程具奏又據稱鎮常二府鹽行浙省地屬江南與松所事同一律必須地方官協力巡查並著陶澍等督率員弁一體認真緝私如有稍分畛域膜視浙鹺准浙江巡撫據實參奏將該上司一體議處至淮場漏私營弁有故縱情弊尤須嚴加考覈其浙商亦毋許藉詞諉卸停運懈巡總期於鹽務大有

裨益欽此

道光十二年九月初九日內閣奉

上諭前以兩淮鹽務自去年辛卯開綱後截至今年四月徵收課銀尙未完三分之二降旨詢問陶澍是否確有把握無誤限期茲據奏稱本年奏銷雖已辦竣綱引尙有存留計九月初間壬辰甫得開徵以一年未竣之綱應兩年必需之款辦理實形竭蹶並瀝陳兩淮鹺務疲敝情形又以職任較繁請另簡鹽政專司課務實屬有心取巧國家設官分職豈容私意更張朕以陶澍前任江蘇巡撫擢任兩江總督於兩淮鹺務自所熟悉是以於前此請裁鹽政改歸總督管理之時降

旨允准如果淮鹽疲敝實難整頓何以於奉命任事之時未
思及此並無一言陳奏及乎兼轄兩年辦無成效又思更改
不過以專管兼管其勢甚相懸殊爲此避重就輕之計非爲
諉卸而何如此居心辦事豈公忠體國者之所爲朕綜理庶
政惟知賞功罰過視乎其人之自取從前曾煥張青選福珠
隆阿福森尙無推諉情事祇因辦理不善且立予罷斥况以
總督兼轄鹽政辦理甚易責無旁貸何得任意推卸且據稱
請飭下湖廣江西安徽等省各督撫凡行銷淮鹽之處招商
領運該督既有此奏卽照所請著湖廣等省各督撫一體招
徠民商由地方官給照到場承充領運俾轉運人眾可期起

色試思行銷淮引之地除湖廣外皆其所轄於緝私辦運招商等務本無掣肘呼應較靈尙且不能辦理豈改設鹽政轉能辦理裕如耶若如是朝更暮改不成政體朕不能爲而朕亦不能對天下矣陶澍著傳旨嚴行申飭該督如有天良卽振刷精神勉圖自效儻辦理不善有負委任朕惟有執法從事治以應得之罪不能稍爲寬貸曾燠等卽係前車之鑒懷之愼之毋自貽誤致干重咎欽此

道光十二年九月初九日內閣奉

上諭陶澍奏參誤公之運判請勒令休致一摺所參是海州運判單壯圖於淮北改試票鹽輒因無利於己屢生異議翼惑

眾心竟置場務於不顧轉藉催商捆運秋單爲名擅離任所連旬之久逗遛揚州屢經該運司催飭該員忽藉患病請假託故支延運判職任分司場務係其專責况海州試行票鹽發運伊始該員竟敢帶印遠出經月不歸場務憑何發運票商必又趑趄加以海州地窪被雨池蕩受淹該員旣稟請委勘並不會同勘辦實屬任意曠延玩視公務該督僅請將該員勒令休致不足示懲單壯圖著卽革職以爲貽誤辦公有心推卸者戒欽此

道光十二年閏九月十三日軍機大臣等奉

上諭本日據陶澍奏蠹商被革乾俸全裁從前之每年坐食數

千金數百金者俱多怨恨兼聞揚人相鬪紙牌繪一桃樹另繪一人爲伐樹狀以寓詛咒其切齒若此恐誤全局請易專管爲兼管以順物情等語此輩固堪髮指然爲國爲公之大臣祇可屏除不顧盡心報國爲是應究者處之以法可也漢岸浮費太甚自應提揚以辦務須秉公覈實勿使虛糜至淮北票鹽業已暢行從前滯岸額引原祇九萬有餘幾於片引不行茲於七八九月內已請票引十萬有零運銷過於原額似此情形淮北票鹽已有起色若得時和年豐淮南綱鹽當可由漸而暢覽奏稍慰該督惟當振刷精神於萬難措手之時勉之又勉俾鹽務漸有起色方爲盡忠報國之大臣切勿

惑於浮議也欽此

道光十二年閏九月十三日奉

上諭陶澍另片奏饒州府岸銷近年益形缺額有專岸之名無專岸之實准其援照成案將饒岸額引改攤通岸網店有力之家一體帶運無須專商賠墊仍照饒岸科則納課以勵眾商欽此

道光十二年十月初五日軍機大臣等奉

上諭御史周彥奏票鹽之法與場竈起徵名異實同場竈起徵利於私而不利於商給票行鹽利於梟而不利於國其可慮有三等語著穆彰阿陶澍將見在淮北鹽務情形及該御史

所列各條詳加審度該御史既言有三可慮又云利多害少
卽移其法於淮南豈非自相矛盾見在試行尙未定局須通
盤籌畫總期有利無弊不可以目前而忘久遠因鹽務而累
及地方也欽此

道光十二年十一月十二日奉

上諭陶澍奏請將當差未能勤勉之鹽運司經歷註銷儘先補
用等語候補兩淮鹽運司經歷吳馨因病稟假輒回原籍旋
又屢假屢銷率意去來實屬怠忽該員有緝獲匪犯奏准儘
先補用之案著卽註銷仍飭令聽候差遣如能自知奮勉將
來按照本班輪補僕仍怠忽卽行參革示懲該部知道欽此

道光十二年十一月十二日奉

上諭陶澍奏參奉差延玩之員以重餉需一摺兩淮試用運判
丁瑞吉領解京餉銀款雖已交清而延不回淮銷差至今將
及三年尚有收銀批照未繳實屬任意延玩丁瑞吉著卽革
職該部知道欽此

道光十二年十二月陶澍等奏緝獲梟匪奉

上諭鹽務漸有起色朕心稍慰然尤當倍加黽勉慎勿半途而
廢糧私梟匪緝拏甚屬認真亦應不遺餘力方可奏功也勉
之欽此

道光十三年二月十五日奉

上諭陶澍奏淮北票鹽試行有效請推廣辦理並復完舊則酌定章程一摺著戶部速議具奏欽此

道光十三年三月初九日奉

上諭陶澍奏漢口鹽岸規費浮濫請將各商解交湖北質訊等語准鹽各岸規費業經裁減漢岸亦經刪定茲據陶澍查明道光十一年該岸又有浮費提到經手各商研審所呈數目甚多是否浮用在官亦或商有浮冒必須提同質對明確所牽涉各衙門均在湖北著將經手各商暨簿冊一併解往湖北交納爾經額就近查傳質訊明確照例定議具奏以肅鹺政欽此

道光十三年九月十七日軍機大臣等奉

上諭貴慶奏糧船例帶食鹽買自長蘆官店前因越境有妨准課是以嚴禁近歲江廣軍船不敢夾帶鹽斤已歷三年旗丁苦累日漸難堪請於江廣回空軍船行抵天津准於例帶食鹽之外酌予增買每百斤一包購帶四十包船到揚州計包交課給予印票收執放行以長蘆輕課之鹽納淮南之課於正額既有贏無絀揚州收此銀兩卽作爲淮南額課准其抵算以昭平允並籌議章程五條開單呈覽當經降旨交戶部議奏茲據戶部奏長蘆兩淮各分引地例不准越界銷售鄰省之鹽多占一分本地之鹽卽少銷一分非固守藩籬不足

以防侵灌該漕督所奏固爲體恤運丁起見惟以長蘆之鹽交兩淮之課究屬越界行銷長蘆引不加增恐啟囤販售私之弊兩淮課由外納恐有場鹽壅滯串通舞弊之虞所稱每船帶鹽不過一艙不及淮南額引百分之一抵次卽可獲利回空必更迅速覈與陶澍前奏回空軍船帶鹽幾及淮引全綱之數沿途逗遛售賣冬杪尙未歸次之語不符近年兩淮奏銷銀數較之庚寅以前多至一百數十萬兩儻因增買蘆鹽有礙淮引將來墮課之員轉得有所藉口惟該漕督所稱旗丁苦累難堪及今不爲調劑則侵蝕正糧折賣船器皆所不免亦不能不預爲區畫等語國家鹽漕並重淮綱積年疲

敝甫有轉機固不可因調劑旗丁轉致顧此失彼旗丁日形苦累亦應量予變通總之更易章程必須兩處情形通盤籌畫方可無虞窒礙兩江總督管理兩淮鹽務江廣漕船過境亦有督飭稽查之責著陶澍屏除意見悉心妥議務期鹽漕兩利方爲妥善欽此

道光十三年九月三十日內閣奉

上諭陶澍奏查緝漕船夾私正以速趨回空未便任帶蘆鹽致使鹽漕兩誤一摺所議甚是前據貴慶奏籌議江廣回空軍船酌增食鹽給票交課章程五條朕卽覺其不可行惟以鹽漕並重不厭精詳當交部議旋據戶部奏增買蘆鹽有妨淮

引降旨令陶澍悉心妥議茲據該督於未奉諭旨之先接該
漕督咨文卽力陳誤鹽亦且誤漕甚爲明晰漕船回空帶私
爲歷來之錮弊並有隨幫風客除本分利坐占淮南數十萬
引綱額句引梟匪肆行無忌漕船停泊買私尤有誤於釐運
前經陶澍派委文武大員於黃河南北及淮揚等處嚴密迎
查並令漕臣會同押空幫弁於直隸山東隘口認真堵緝卽
寓催趨於查緝之中回空歸次亦較前迅速糧私旣絕官引
自銷江廣等省雖連值水災銷數尙增本年漕船實由兌運
艱難以致稽緩儘可嚴行催趨以速補遲若將漕員撤退則
幫丁舵水人等俱知禁令已弛必至放膽買鹽明縱偷漏旣

害鹺綱欲速反遲尤誤漕運至該漕督請於例買食鹽四十斤外請在長蘆加買過揚納課不但有誤回空並且有誤重運况漕船水手素稱桀驁加以順帶官鹽必有梟販出資附和以天庾正供之船爲聚賭匪黨之藪且所銷盡長蘆之私所缺盡淮南之課實爲自壞藩籬至丁情苦累准帶土宜津貼以鹺綱爲丁舵沾潤之計國家亦無此政體著直隸總督山東巡撫長蘆鹽政天津鎮總兵仍嚴督沿河營汎州縣查拏梟匪窩國堵截私鹽偷上漕船並著署漕運總督恩銘仍派幹練漕弁於各要隘會同幫弁堵截搜查其有已經議撤者仍行添設不准帶私停留務期迅速南下其楚西綱岸不

致於歉歲滯銷之後再受糧私侵佔並著責成陶澍實力整頓以期鹽務日有起色不至滯銷庶鹽漕均有裨益欽此

道光十三年十月二十三日內閣奉

上諭前據貴慶奏籌議江廣回空軍船酌增食鹽給票交課章程五條調劑旗丁當降旨交陶澍體察情形悉心妥議該督於接到該漕督咨文卽力陳誤鹽且致誤漕議駁明晰特降旨令直隸總督等仍嚴飭沿河營汎州縣查拏梟匪窩囤堵截私鹽透上漕船其已撤搜查漕弁仍行添設不准帶私停留茲復據陶澍奏旗丁得項不爲不厚揆其苦累之由多緣旗丁任意銷糜且受兌開行以至通倉交卸均不免受人勒

索如果禁絕諸弊漕務少消耗之數則丁力自舒不但淮鹽藉免充塞卽兵弁挑斥米色橫索幫規亦可斂戢儻旗丁中有刁玩之徒敢於侵蝕正糧折賣船器必當執法嚴懲豈可慮有此弊而豫爲調劑事事請益時時議加不但國家無此政體必致不肖旗丁恃有調劑不知止足是除弊而轉益滋弊見在回空軍船陸續抵入江境該督卽遴委道將帶同廉幹員弁沿途堵緝糧私並於揚州以至蕪湖九江等處實力查拏有犯必懲著漕運總督督同各糧道通計每年經費量入爲出自淮及通確查積弊嚴禁弁員胥役之勒索並著倉場侍郎通飭各倉監督嚴查經紀人等指勒苛求務期弊端

淨絕不使旗丁有所藉口以肅漕政而杜糧私欽此

道光十四年二月二十六日奉

上諭陶澍奏請遴委總辦票鹽一摺淮北試行票鹽需員經理著照所請准其以海州知州王用賓派充委員總辦票鹽事務該員係實缺人員著於委辦票鹽局內仍照實缺人員計算該部知道欽此

道光十四年二月二十六日奉

上諭陶澍奏請將辦理票鹽尤爲出力人員分別獎勵等語著照所請江蘇改補知縣王澄試用鹽知事陳慶恒經理卡巡認真出力均著各以本班儘先補用臨興場大使王汝琨經

辦妥貼試用鹽經歷馮鼎祚試用批驗所大使程松在事兩年均能妥協俱著交部議叙該部知道欽此

道光十四年九月二十七日奉

上諭陶澍奏參場員督煎不力巡緝有疏請分別撤任摘頂一摺兩淮通分司所屬掘港場大使錢同謨於本年發票商鹽積至一萬五千餘引屢經該督飭催迄未捆運出場難保無虛數捏報情弊又於出私隘口每有透漏實屬巡緝不力著卽撤任留於該場催煎堵緝泰分司所屬之富安場已發票鹽二萬餘引丁谿場已發票鹽一萬八千餘引節次嚴催均未捆運到壩若非怠煎透私何至無鹽捆運富安場大使王

守符丁谿場大使朱光德著一併摘去頂戴暫行留任督煎
緝私並著該督勒令該場員等將缺產鹽斤趕緊補足捆運
儻始終怠玩卽著從嚴參革其餘各場有無疲玩卽著從嚴
參辦欽此

道光十四年十二月二十二日內閣奉

上諭前據御史許球奏兩淮鹽務辦理支飾情形當降旨交戶
部查覈具奏茲據奏兩淮歷年題報額徵課款覈算癸巳綱
徵完銀數較辛卯綱實少徵銀二十三萬餘兩較壬辰綱實
少徵銀四十四萬餘兩其自癸巳綱起停止加帶配割正引
未完正雜課銀仍有三十餘萬兩並未能多交銀一百七十

八萬兩較辛壬兩綱又少完加斤銀四十餘萬兩覈計自嘉慶十二年至道光六年牽算每年解過銀四百餘萬兩道光七年解過銀六百萬兩覈與該御史所奏比較各款銀數均屬相符至帑利等銀向係分解京外各衙門之款總未據造冊報部見據在京各衙門均有奏催之案著陶澍仍遵前旨迅卽按款造報以備稽覈又據查該御史所奏趕銷積引毋誤奏銷並籌及票鹽各情形均係准鹺緊要關鍵覈計壬癸未運各引實已積至一綱有餘見在已屆年終儻尙有未清積引勢必年復一年愈積愈多又開牽混之門永無清釐之日更復成何事體兩淮鹽課奏銷例有定限前據該督將辛

卯奏銷奏請展限經該部議覆予限四箇月自應運清積引依限奏銷並逐漸提歸二月原限斷不可再有遲延又滋膠轄著該督卽將未清積引埽數銷完其新綱奏銷仍確遵奏定限期不准稍有遲逾以正綱分而免積壓至淮北見行票鹽該督前奏試行有效並請推廣辦理若如該御史所奏見在搶案紛紛疊出覈與該督前奏情形迥有不同儻稍滋流弊因鹽務而累及地方所關甚鉅著該督認真查辦將如何稽查防範不至滋生事端並見在有無搶案疊出之處據實具奏毋稍含混兩淮鹽務改歸總督兼轄疏銷緝捕呼應較靈且裁革浮費清釐積欠截前杜後永斷葛藤正應剔除弊

端年清年款提歸每年二月奏銷原限乃正雜各課及帑利等銀逐年短絀舊欠未完新虧又積年復一年伊於胡底朕綜理庶政惟知賞功罰過視乎其人之自取從前曾煥張青選福珠隆阿福森辦理不善立予罷斥卽係前車之鑒該督如有天良卽當實力疏銷通盤籌畫振刷精神勉圖自效儻稍有迴護混飾彌縫苟且一時毫無實效帑課攸關豈容因循貽誤朕惟有執法從事治以應得之罪斷不稍爲寬貸懍之慎之欽此

道光十五年正月二十三日軍機大臣等奉

上諭前據御史許球奏兩淮鹽務辦理支飾情形經戶部查覈

具奏當降旨交陶澍認真查辦實力疏銷毋許稍存回護茲據陶澍將歷年辦理鹺務實在情形據實具奏朕詳加披閱自係前降諭旨該督尙未奉到此次所奏尙無支飾強辯情詞惟兩淮鹺務當積疲之後必應竭力整頓以期日有起色漸次挽復舊章且以總督兼轄鹽政呼應較靈正宜清釐積欠剔除弊端年清年款提歸每年奏銷原限甲午新引見已開綱該督卽督飭運司趕緊督運以符奏銷期限務歸年清年款方爲不負委任欽此

道光十五年正月二十四日內閣奉

上諭陶澍奏請變通巡江章程一摺兩淮商鹽船隻每多夾私

盜賣捏報淹消等弊前經降旨每屆半年酌委參遊守備或文職二員自儀徵大江溯流巡緝至湖口縣分路一往江西一往漢口仍由原路查回儀徵換委妥員前往接巡遇有夾私捏報之案隨時懲辦茲據該督查明安慶府屬之華陽鎮彭澤縣屬之沙灣馬當二處均係楚西船隻失事被搶積慣盜賣之地該三處均著各調撥鹽務紅船四隻雇用小船兩隻遴委都守千把一員帶兵十名並遴委鹽務候補運判經歷知事大使一員雇募巡役十名各駕坐紅船一隻小船一隻分段護送催趲上下會巡交替如遇鹽船擱淺難行卽爲隨時起駁儻有匪徒搶劫暨船戶盜賣情事會同協力查拏

交地方官嚴辦並責成訪察夾帶賣私捏報淹消等弊仍按
半年一換以均勞逸其所需紅船舵水工食小船價銀及員
弁兵役薪飯著照巡江章程給發每年於商捐緝私經費內
動支欽此

道光十五年正月奉

上諭陶澍奏加帶舊綱殘引請仍照案停止俟積滯疏銷再行
攤帶一摺兩淮加帶己庚殘引前經戶部具題飭令遵照前
奏照常帶徵茲據陶澍奏稱新舊並運實行喫重且致占礙
正綱請於甲午開綱時仍照奏准原案停止加帶著准其將
己庚未完殘引暫予停運俟引鹽暢銷後再行酌帶以正綱

分而利疏銷惟停止加帶殘引原爲疏通正綱地步甲午新引見已開綱該督卽督飭趕緊督運以符奏銷限期務歸年清年款且停止加帶於本綱正額卽無占礙該督更無所藉口正宜乘此疏銷斷不准再有積壓儻舊引已停而新綱又滯是始終以虛詞搪塞恐該督不能當此重咎也懷之該部知道欽此

道光十五年二月兩江總督陶澍奏兩淮鹽務見辦事宜
奉

上諭嗣後若果有成效年勝一年朕豈有不爲卿作主之理無恤其他可也若歲歲空言搪塞部中不難稽覈前車未遠朕

不能上下其手也噬臍二字懍之戒之欽此

道光十五年閏六月內閣奉

上

諭訥爾經額等奏籌議禁戢銅船鉛船夾帶私鹽以肅鹺政

一摺湖廣省每年額銷官引爲淮綱最重口岸祇以界連數省水陸交衝私販每多侵灌官引輒至滯銷必應隨時整飭設法禁戢茲據該督等查明銅鉛船隻自四川裝運北上一路收買私鹽入楚售賣經由卡隘並不聽候查驗自非督飭嚴拏不足以資鎮壓嗣後銅鉛船隻經由宜昌府所屬地方著卽飭令該鎮總兵親督卡運各員查驗催遣儻有水手抗拒及逃散挾制等事卽拏交地方官究辦一面代爲雇覓水

手迅速開行以符例限並著雲貴四川各督撫嚴飭運員務將船價水脚照數給發不准稍有尅扣運船過境飭令沿途各州縣加意稽查如有私行售給該船戶鹽斤卽行嚴拏懲治儻不認真查辦一經楚省察出夾私情事卽著行知川省嚴實查參惟銅鉛船隻聽候稽查不無停待仍應嚴飭卡員查無夾私等弊立卽趕緊放行斷不准藉端勒指稍有稽遲致誤鼓鑄務俾鹽務銅運兩有裨益欽此

道光十五年閏六月初七日奉

上諭陶澍奏籌款挑挖鹽河一摺江蘇通泰兩屬河道淤墊本年入春以來雨澤稀少船行淺阻垣鹽停捆已逾兩月各場

小河亦因乾旱無水竈鹽不能歸垣自應及時疏濬以利船行所有通州所屬自海安以東至馬塘鎮止計一百五六十里泰州所屬自嵇家樓以上至青浦閣一帶計二十餘里著陶澍分派妥員會同該分司逐段丈量擇其尤爲淤淺必應加挑處所確切估計趕緊挑挖深通所需夫工等費准其撥給道光十年官運淮北光州等岸引鹽項下贏餘銀五萬四千五百餘兩並官督商運引鹽內提存備公銀一萬一千二百兩作爲挑挖鹽河之用如有不敷准其由商人酌捐湊辦其場竈小河亦准由各垣商分別緩急普律挑濬均著免其造冊報銷該部知道欽此

道光十五年七月初四日奉

上諭陶澍奏請將督煎足額之場員開復頂戴並不知奮勉之員勒休一摺前據該督奏稱兩淮通州分司所屬掘港場大使錢同謨督煎不力巡緝懈弛泰分司所屬富安場大使王守符丁谿場大使朱光德捆運鹽斤亦多缺額當經降旨將該員等分別撤任摘去頂戴茲據該督查明王守符朱光德自奏參後將缺產鹽斤督煎足額尙知愧奮王守符朱光德著加恩賞還頂戴錢同謨於被參撤任後未能將缺產鹽煎足其報存垣鹽盤查又復短少著卽勒令休致該部知道欽此

道光十五年十二月十五日奉

上諭前據陶澍援案奏請將乙未綱引課分年帶運當降旨交戶部議奏茲據該部奏稱查明該督所奏一綱之課分帶十年並奏銷逐年提前一月是否確有把握不致有名無實其乙未綱支發雜款並道光十年以後應解各部院帑利及內務府參斤皮張變價等項積欠屢經飭催並未按年徵解究竟作何籌畫俾國課不致虛懸雜項帑利均歸有著原奏內均未議及著陶澍逐款確核明白覆奏欽此

道光十五年十二月二十七日內閣奉

上諭前據陶澍覆奏乙未綱引課分年帶運各情形當降旨著

戶部議奏茲據戶部奏稱兩淮大局課項商情兩有關繫必須通盤籌畫方不致顧此失彼奏銷限制尤屬全綱要務定例完納一綱於次年二月題報兩淮自奏請展限之後迄今尙未復歸原制見在鹽務日有起色著自丙申綱起務於次年二月造報奏銷以後著確遵定限不准再有推展以清綱分至所稱陳鹽愈積商力益疲請將乙未綱引分作十年帶運無虞壅滯著卽照所請辦理惟分綱帶運正雜銀兩必須按限徵完課項方歸有著該督覆奏雖逆計將來謂可無虧課項而屆時作何辦法尙未縷悉敷陳著陶澍先事熟籌認真妥辦務將舊積岸鹽及時趕運新綱引目豫計疏銷至乙

未綱支發各項著籌款解清其辛卯以後欠解帑利等銀著
按綱完繳儻既經分帶復蹈從前故轍丙申奏銷仍未能提
歸原限各綱欠解之款尙復拖延乙未綱應支之項不能設
法撥解致誤要需或將庫款借墊挪移又滋套搭卒致引宐
課懸均歸無著該督自問能當此重咎耶嗣後務須通盤籌
畫不准動以緩帶爲詞卽再有懇恩展限亦斷不能仰邀允
准也懍之慎之欽此

道光十六年正月初七日軍機大臣等奉

上諭前據陶澍奏江廣鹽多滯銷又據訥爾經額奏楚岸鹽斤
短缺兩省同時具奏情形互異當降旨著陶澍將江廣各口

岸實在情形查明據實覆奏茲據陶澍奏稱查明湖廣全省年額應銷七十七萬九千九百餘引春夏二季僅銷過三十萬四千四百十四引尙未及年額之半秋冬二季未據報到該省奏稱該岸祇贖鹽一萬八千二十七引未將已銷之數提及無從核算此時漢岸之鹽似因場運偶稽而不繼未必盡因多銷而見缺等語鹽務以轉運疏銷爲要若銷路未暢轉運爲之不靈據陶澍奏稱上年江廣口岸額銷引數查春夏二季尙未銷及年額之半訥爾經額則稱截至十一月二十日止除銷過鹽六十三萬五百五十六引見祇贖一萬八千二十七引此項引鹽所銷究係何綱著陶澍訥爾經額查

明據實具奏至口岸銷鹽各有定數兩淮總司全局必應趕
催接濟無誤轉運嗣後趕運不速著陶澍實力催提至口岸
疏銷責成訥爾經額認真經理隨銷隨覈總期岸銷大暢以
資轉輸務須不分畛域覈實辦理以期鹽務日有起色方爲
不負委任陶澍行抵該省將鹽務應辦事件與訥爾經額悉
心妥籌實力趕辦無誤釐綱全局儻辦理不善惟該督等是
問咎有攸歸懷之慎之欽此

上諭兩淮釐務既有轉機自須因時因勢持以久遠俾國課日
見充裕正當乘此鹽務日有起色之時實力整頓無負委任

方不愧爲國宣力之大臣欽此

道光十六年二月十三日內閣奉

上諭前因陶澍訥爾經額所奏江廣口岸額設鹽引情形互異當降旨著該督等查明具奏茲據陶澍奏稱鹽法納課請引向以綱計及至分運各岸止按年計額而不按綱鹽旣隨到隨銷是綱分雖有新舊而銷售並無後先等語鹽務以轉運疏銷爲要若銷路不暢轉運爲之不靈該督統轄三省因應成算在胸至江西安徽各撫臣亦有專責嗣後著一體認真就近督辦同心併力畛域不分兼與湖廣督臣悉心妥籌實力趕辦其口岸疏銷責成各省督撫認真經理隨銷隨繳其

趕運迅速則責成陶澍實力催提以資轉輸務使岸銷大暢俾鹽務日有起色儻仍復稽遲滯銷有誤鹺綱全局惟該督撫等是問懷之欽此

道光十六年十月內閣奉

上諭給事中鮑文韶奏陶澍違禁私刊奏疏一摺並將原刊奏疏呈覽朕詳加披閱其所刊刻俱係發鈔事件惟封疆大吏身膺重任所奉硃批理當慎密方爲不負委任陶澍輒行刊布迹近沽名殊失公爾忘私之義陶澍著交部議處至另片奏准北票鹽辦理不善等語准北改行票鹽總期於國課民食兩有裨益如該督於每年奏銷鹽課短絀該部自能參奏

卽令民食不便其所行票鹽各省該督撫亦必具陳利弊候
朕施行鮑文韶此奏摺摭瑣屑意涉挾嫌此風斷不可長鮑
文韶一併交部議處欽此

道光十六年十二月初三日內閣奉

上諭本日陶澍訥爾經額等會奏籌辦楚省鹺務並請禁鍋口
一摺據稱湖南郴州所屬之永興縣係粵鹽引地粵商開設
子店行銷生鹽乃近來多設熬鍋將生鹽熟鹽侵灌淮界以
致楚省引額短絀等語粵楚毘連辦理鹽務各思踊躍但必
須兩無妨礙方爲盡善若如該督等所奏多留熬鍋爲姦商
開偷漏之門陷愚民蹈販私之網不可不嚴行查禁著鄧廷

楨卽出示曉諭所有永興子店六十五家每家祇准存鍋一口永爲定額不准私自加增如添設子店鍋口尺寸亦不准稍有寬大總期於粵引淮綱兩無妨礙是爲至要欽此

道光十七年正月三十日內閣奉

上諭鹽引暢銷總期裕課便民各該督撫奉公盡職原應不分畛域而所轄引地亦宜畫清界限以杜侵越方爲辦理妥協茲據陶澍奏稱安徽之徽州府與江西之廣信府例食浙鹽均在兩省腹地私鹽由浙灌入以致安徽江西各府均被侵占在浙商總以便民食爲詞每於徽州廣信等府界開設私店而淮鹽受害漸有侵占之虞著烏爾恭額嚴查姦商禁止

偷販除假公濟私之弊杜越境售私之習整頓自爲得力各省一體照辦俾行鹽則各依疆界緝私則無分彼此庶鹽務日有起色而轉銷各有責成矣欽此

道光十七年二月奉

上諭御史黃樂之奏請勘明淮粵行鹽引地並設卡巡查以杜私銷一摺著陶澍鄧廷楨會同詳查妥議具奏摺並發欽此
道光十七年二月十九日軍機大臣等奉

上諭本日據訥爾經額奏稱上年楚省行銷淮鹽共銷引七十萬有奇較之銷數最暢之十四年分尙多六千餘引且自辛卯綱每引加斤計算已逾額銷之數實屬大有起色林則

內江鹽法元卷四
徐到任以後自必稽覈舊章因勢利導仍當嚴飭各處設法
疏銷不可因甫有起色稍形疏懈至楚省行銷淮南鹽引本
屬一氣相通各該省大吏經朕委任必應熟籌情勢於畫清
界限之中仍有並行不悖之意方稱辦理妥善林則徐曾兩
署兩江總督印務於鹽務素所熟悉其楚岸應銷淮南鹽引
早應成竹在胸見當接任之初尤宜盡心籌畫不分畛域督
飭文武員弁巡商實力整頓堵緝鄰私搜查夾帶庶官引日
形疏暢而國課益見充盈矣欽此

道光十七年四月十三日軍機大臣等奉

上諭本日據陶澍奏淮鹺實在情形一摺兩淮鹽務最爲繁重

一切催徵催運各事宜該督責無旁貸已故運使劉萬程竭慮急公本屬職分所當爲見因病發輕生該督正當督飭新任運使陸蔭奎認真經理期於課額無虧方爲不負委任何得因劉萬程一人輒謂諸事掣肘遽請欽派大臣前往查議籌辦此奏殊出意外太不成事總之引課奏銷原係該督專責如果辦理得宜自可日有起色卽謂兩淮責在督運其督銷之任分寄湖廣江西安徽各督撫獨不思江西安徽均係該督統轄省分其應如何實力堵緝趕緊疏銷無難與兩省巡撫妥爲籌辦至湖廣分銷大口岸與淮南本屬一氣相通前已有旨令林則徐盡心籌畫不分畛域如有應行會議之

處儘可隨時咨商從長計議該督受恩深重惟當實心籌辦
不得以力單任重爲詞藉圖卸責儻畏難觀望以致鹺務不
見起色朕惟該督是問欽此

道光十七年五月初四日內閣奉

上諭戶部奏各省鹽務積欠課款並短徵加價銀兩延不造報
請旨飭催各省奉部咨查事件例有定限况課款攸關尤應
依限造册咨覆以憑覈辦茲據該部查明各省鹽務項下有
歷次行查逾期未覆各案內借動加價及參商欠交等款均
係奏明分別歸補變抵其短徵加價銀兩該部各按行銷引
目覈算兩淮計短徵銀二百五十餘萬兩兩浙計短徵銀二

十餘萬兩節經按年彙案行催總未據該管督撫鹽政查明
咨覆實屬任意玩延儻再日久積壓必致應入撥者無憑撥
解應覈銷者易涉牽混百弊叢生殊非慎重帑項之道著該
管督撫鹽政迅卽按款查明勒限一月據實分別造報不准
再有延宕所有各案歷年登覆遲延職名著隨案送部覈議
如經此次飭催之後仍復視爲具文有逾例限定將該管督
撫鹽政等重懲不貸欽此

道光十七年五月十一日內閣奉

上諭前降旨飭令陶澍實心籌辦鹽務茲據奏稱查明見在奏
銷不誤庫貯銀兩足供正撥之需商情甯勉尙有起色等語

辦理鹽務全在轉運暢銷杜絕漏私之弊至楚省與兩淮本屬一氣相通林則徐曾署兩江總督其於鹺務轉運交關之處熟悉情形見經酌定道里遠近限期由水販交付鹽行送局齋道不准由州縣催繳可免需索留難辦理甚爲合宜其場岸鄰近梟私仍著不分畛域飭令文武員弁扼要巡查該督隨時稽覈功過以示勸懲此外催徵催運各事宜陶澍惟當督同運司實力整頓以冀日有起色方爲不負委任欽此

道光十七年五月十六日內閣奉

上諭林則徐奏銅鉛船隻夾帶私鹽請將運員總兵分別議處一摺所奏甚是滇黔銅鉛向由川船裝載藉差夾帶私鹽爲

弊滋甚前降諭旨飭令經由卡隘認真查驗有犯卽懲原所
以杜私衛引整飭離綱茲據該督查明雲南委員署大關同
知彭衍輝領運銅船並不攏卡經兵役等追獲私鹽貴州委
員龍泉縣知縣童翬船不泊岸順流直下追赴下游就彼驗
放該運員等於船戶冒越避查均有失察之咎彭衍輝童翬
俱著交部分別議處護宜昌鎮總兵倭仁布並不遵照前奉
諭旨親督卡運各員實力查驗迨該船不聽搜查僅以趕往
截驗一語含糊具稟顯係意存遷就倭仁布著交部議處此
次議處各員著該部專摺具奏至銅鉛船隻夾帶川省私鹽
最爲淮綱之害著四川總督查飭夔州府於各船過關查稅

之便務將所帶私鹽一併認真查起並嚴飭瀘州酆都忠州雲陽巫山各州縣隨時隨地加意稽查儻該處場店膽敢將川鹽賣給船戶一經查出卽行嚴拏按律懲治毋稍徇縱該督等惟當以公事爲重不分畛域實力稽查務期買私諸弊一律肅清庶於鹺務銅運兩無妨礙如敢意存膜視任聽私販充斥再經楚省搜獲除將失察透私之州縣及縱漏之夔關照例查參議處外定將該督一併懲處決不寬貸欽此

道光十七年五月十七日內閣奉

上諭御史袁文祥奏私鹽充斥請設法清釐一摺各省鹽引滯銷由於私販日多或弁兵帶有鹽梟未能實力捕拏或兵役

得賄縱放不行阻止鄰私由是充斥而官引因以難行又商人以正引外帶有私鹽先儘私鹽賣竣而後及正引私販私帶之鹽皆出於場竈緝私而不究私所自出則弊源未遏安望鹽務日有起色著管理鹽務各省督撫鹽政嚴飭所屬務於場竈所在設法認真稽查所出之鹽毋使以多報少通同隱漏庶餘鹽不致泛溢四出卽正引之鹽亦不致爲私帶所積壓其如何酌定章程實力奉行可收實效之處該督撫鹽政等著各就見在情形悉心妥議具奏將此通諭知之欽此

道光十七年九月十八日內閣奉

上諭林則徐奏稽查鹽務拏獲私梟官引漸見疏銷等語湖廣

私鹽充斥大爲淮綱之害該督委員巡緝拏獲多起私販既知歛迹官引自可暢行下游長沙一帶可免侵灌卽至永寶一帶久不銷引之地亦可漸冀挽回衡永郴桂道駐劄衡州堵緝粵私耳目較近此次各屬拏獲私鹽多由該道設法督拏著卽責成該道就近督飭地方員弁力堵粵私使淮引得以暢銷儻日久疏懈致民間仍食鄰私卽將各該地方員弁分別撤參並將該道嚴參懲處至衡永各處路徑叢雜雖設有水陸卡座而私販繞越無常該督議將卡巡改爲游巡隨處探拏較易得力卽著該督飭令該道張晉熙督率委員暨各該州縣勘明私販來路何處最爲扼要何處最涉紛歧游

巡員弁應如何分合稽查詳細籌議章程由該督覈定試辦仍察看是否得力有無成效據實奏聞總期粵私不得侵灌淮引不致滯銷方爲辦理有效毋得空言塞責日久視爲具文欽此

道光十七年十一月十五口內閣奉

上諭御史高枚奏私鹽售販請嚴禁煎熬囤積之處一摺各省鹽引滯銷皆由私梟充斥地方官多方偵緝而不能究所由來終非拔本塞源之道欲使鹽無私販之人必使地無私售之鹽而後弊端可絕鹺務肅清該州縣及各場大使果能留心查察則私煎私曬之弊不難一望而知立即緝拏到案嚴

行懲辦嗣後著各該督撫通飭所屬地方官務當隨時隨地認真稽查一經緝獲私鹽務卽究明來歷痛懲私賣之人則私鹽自無所出而梟販自靖矣至配引之時向有子鹽名目近聞子過於母任意夾帶其弊較私販尤甚該鹽政務須嚴飭監掣官員除照例搭配子鹽外概不准瞻徇情面致令子過於母以防浮濫而裕引課將此通諭知之欽此

道光十七年十二月十一日奉

上諭鄧廷楨奏子店熬鍋難以限額請照舊辦理一摺前因陶澍等會籌楚省鹺務奏請嚴禁鍋口當有旨令鄧廷楨查禁永興子店鍋口不准私增茲據該督奏稱粵鹽例准生熟兼

銷永興一帶戶口繁多子店銷熱十倍於銷生且開歇靡常
不惟熬鹽鍋窰斷難定額卽子店多少亦不能定數見在引
數日絀若再限以鍋口於民食課餉兩有妨礙等語各省鹺
務漸形疲敝該督撫鹽政等果能藩籬自固實力緝私旣免
侵灌之虞自收暢銷之效若因楚省額短引絀輒更粵省成
規限以鍋數不特於兩淮毫無裨益卽粵省鹺政轉多窒礙
難行所有湖南永興子店行銷粵引著准其仍照舊章實心
經理該督惟當隨時體察總以鹽銷之滯旺酌鍋口之減添
並著督飭所屬各歸本界認真巡查訪有私梟立卽嚴拏懲
辦不得稍存畛域之見互相觀望以裕國課而肅鹺綱欽此

道光十九年六月初四日內閣奉

上諭國家經費有常度支有節凡各省應納之賦及其餘稅課均於徵收後隨時入撥報解不容絲毫短少所以重帑項而權出入茲據戶部查明積年漸久延欠頻仍總計欠解銀數除鹽務懸引未完及帑利等款准其分別展緩外其餘拖欠有二千九百四十餘萬兩之多若不亟加整頓何以備度支而裕國用著該直省督撫將軍府尹鹽政監督暨該管司道等認真稽考將未完各款逐一清釐應解者按限起解應撥者趕令入撥如查有州縣彌縫掩飾等弊迅卽嚴參示懲斷不准通融隱飾將就目前經此次查辦之後儻仍延宕不完

定將各該管大吏重懲不貸欽此

道光二十二年三月十四日奉

上諭御史黎光曙奏兩淮鹽務宜暫爲變通請飭妥議一摺據稱兩淮鹺務自淮北改行票鹽以來商販輻輳若以暫停淮南一年之引將淮南引地概准票販行銷則票資無庸發還除解足淮南正雜款銀外尙可多數百萬兩於國計不爲無補等語該督體察情形通盤籌畫是否可行妥議具奏欽此

道光二十三年二月十六日軍機大臣等奉

上諭前據耆英奏淮南鹽課照常奏銷銀兩分限造報一摺當交戶部議奏茲據該部奏稱奏銷預報全完額課仍須續繳

事屬創見等語著准其將壬寅一半正課一百餘萬兩按數造報無誤撥解其餘一百餘萬兩亦即趕緊催交限八月內埽數全清報部聽撥如果屆期絲毫無欠癸卯甲辰乙巳三綱始准照辦截至丙午綱復歸二月奏銷以符成例不得因此次准予分限率行援引推展如本年八月一半課項報解稍有未清即將該運司嚴參重懲其各商捐輸銀兩著即轉飭迅速悉數交清報部存案欽此

道光二十四年正月內閣奉

上諭朕聞近來江南河工時有過往官員及舉貢生監幕友入等前往求助該河道及道廳等官礙於情面不能不量爲資

助以致往者日眾竟有應接不暇之勢不知河工銀兩絲毫皆關國帑河員承領錢糧均有購料修防之責儻過往官員舉貢生監幕友等視爲利途紛紛前往該員等焉有自出己資之理無非濫請支領尅減工程以爲應酬之費於河務甚有關繫不可不嚴行禁止因思此等遊客不能無因至前往向在京官員求索書信以爲先容甚至囑託該河督授意屬員廣爲吹噓此風可惡之至著潘錫恩通飭各屬一律嚴禁嗣後查有執信往謁意在干求者著該河督卽將其人暫行扣留指名參奏其有向道廳求助業經幫助銀兩者卽將授受之人一併參辦概不得意存見好稍事姑容並著兩江

內務府奏
卷四
三
總督明查暗訪儻此後仍有前項情弊該河督未卽舉發卽行單銜奏參庶幾懲一儆百力挽頽風南河既有此弊東河亦所不免著東河總督通行嚴禁並責成山東河南巡撫一體訪查至各省鹽務衙門向來陋習相沿亦應嚴行杜絕著通飭各省鹽政一概禁止毋任虛糜課餉其兼管之各省督撫均著密行稽察以期弊絕風清經此次通飭禁止以後兩河道廳及鹽務官員儻再藉口應酬以致侵欺帑項必當嚴加懲治不貸將此通諭知之欽此

道光二十四年五月十九日軍機大臣等奉

上諭御史劉良駒奏請推廣票鹽一摺准北票鹽試行有效准

南事同一律見在官引滯銷積疲已甚亦宜設法變通以期
便民裕課著璧昌詳察情形統籌全局是否可以做照淮北
見辦章程改行票鹽之處悉心妥議具奏另片奏票鹽章程
驟難徧及請先於上下江食岸試行然後推及江西湖廣卽
著璧昌咨行該督撫各就該處地方情形熟商定議以冀推
行漸廣有益全綱至近來銀貴錢賤爲各省通病該御史所
奏銀錢兼收就近撥解之處是否可行亦著璧昌等一併詳
議奏辦欽此

道光二十六年閏五月十三日奉

上諭前因兵部議覆璧昌前請於三江口等處設立鹽捕專營

恐日久不得其人仍屬有名無實等語曾降旨令賽尙阿等親往履勘核議具奏茲據奏稱親至其處察看霍家橋實爲切要門戶添設專營不特鹽務賴以緝私兼可爲揚州保障且添兵之難在於籌餉業經查據該督切實聲明可以永久不動正項其事自屬可行著准其於霍家橋添設鹽捕專營員弁兵丁如數增添所有俸餉等項既據該督稱於鹽務籌撥卽著免其造冊報銷但必期行之永久儻日後偶因經費短絀奏請借動別項亦斷不能倖邀允准至運司緝私是其專責若不兼轄武職亦恐呼應不靈該督所請加運司兵備兼銜之處并著准其兼銜以資制馭他省不得援以爲例其

新設官兵仍責成該督督飭運司認真巡防訓練隨時考核期於兵歸實用餉不虛糜毋致日久視爲具文餘著照所議辦理該部知道欽此

道光二十七年十月初一日內閣奉

上諭李星沅奏拏獲引船夾帶私鹽請將運判等分別撤任革職究辦等語江南通州分司運判趙祖玉試用知縣顏晉敏督捆官鹽雇船裝運出場經委員查出私鹽一百十五萬九千餘斤之多實從來所未有藉官行私通同故縱非從嚴查辦何以懲私蠹而儆官邪趙祖玉著卽行撤任顏晉敏著暫行革職均交該督提同船戶人等確切研訊根究鹽斤來歷

按律從嚴懲辦至攬頭婁鑿雖已潛逃不難弋獲務將確情
訊出毋任狡飾推卸儻有知情故縱情節卽行據實嚴參欽
此

道光二十七年十一月初五日軍機大臣等奉

上諭本日戶部遵議李星沅奏淮南鹽務見辦章程一摺已依
議行矣又片奏楚岸滯銷情形等語據稱楚岸鹽價前因積
滯過多先後酌減見在存鹽積引幾及三綱之數銀價日昂
鹽價日形喫重若不亟加整頓於國課關係匪輕著李星沅
裕泰率同該運司鹽道確查漢岸見時鹽價每斤究係合錢
若干並見在存鹽因何遞年積壓一至於此究應如何設法

補救之處熟籌妥議迅速奏辦至淮南行銷之江西安徽湖南湖北各口岸巡緝尤關緊要著該督等分咨該撫嚴飭地方文武不分畛域實力巡查總期實心經理俾鹺務日有起色該督撫受恩深重具有天良當此國用支絀之時再不力圖振作年復一年伊於胡底該地方員弁尤當各顧考成認真辦理不得視爲具文仍前玩泄也欽此

道光二十九年十月兩江總督陸建瀛奏淮南鹺務積疲情形奉

上諭不但不可稍存避就之心必當猛以濟寬誓除刁惡方可辦理也無恤其他欽此

道光三十年二月二十日內閣奉

上諭陸建瀛奏請立限清查運庫一摺兩淮鹽務近來商引滯銷以致庫款支絀若竟任其挪墊套搭必且寢成虧空亟應趕緊清釐確求辦法所有兩淮運庫款目准其子限半年責成該督遴派妥員逐款鉤稽仍分別商欠官虧勒限從嚴參追不准稍有姑容該督職兼鹽政責無旁貸務當認真覈辦俾舊弊悉清新虧永杜以重帑項而肅鹺政欽此

道光三十年三月初九日軍機大臣等奉

上諭據戶部遵議陸建瀛奏准鹺興利除弊一摺據奏原議各條如按舊科則酌減外費酌復額引加帶乙鹽均以輕成本

而恤疲商永禁整輪覈實岸費以及刪除繁文務歸簡易亦與從前奏案相符至改捆鹽包以剔除弊混分年批補以調劑災商均屬妥協已依議行矣惟分岸運銷一層水販領照之後不由地方文武員弁稽查能否不致越界侵灌有礙鄰省引地且改運九江已寓行票之意如何杜絕姦商不令詭名領票致鹽引虛懸國課無出事窮則變固不能拘泥舊章而創始之時必須熟籌全局爲可大可久之計其綱食科則請歸一律官定場價以免居奇兩條亦皆議改章程有無窒礙殊難懸揣該督身膺重寄當國用支絀之時獨能不避嫌怨力籌整頓於淮鹺疲亟之秋籌補偏救弊之策但此三層

果否確有把握可以久行無弊並如何嚴禁竈私均未據切實指陳著該督博採旁諮秉公妥議具奏又戶部片奏裁費爲救弊要著淮南與漢岸必須相助爲理設再任不肖官吏藉詞掣肘相率阻撓是名爲革除浮費而仍託諸空言安望日有起色著陸建瀛咨商各該督撫不分畛域督飭所屬實力會辦務須破除情面不顧己私一洗向來惡習是爲至要前據給事中曹履泰奏請復窩單以符舊制並陳利弊八條一摺於見在辦理情形有無可以採擇之處著鈔給閱看該督肩此重任責無旁貸朕深加倚賴惟當堅持定力認真辦理中飽之弊亟應禁革所論裁汰浮費必不便於貧蠹官吏

儻有掣肘阻撓之員卽行參辦但須著有成效方爲不負委任設將來並無起色甚至日漸疲敝朕惟該督是問將此諭知陸建瀛並諭令裕泰王植費開綬知之欽此

道光三十年四月十一日內閣奉

上諭戶部奏鹽引暢銷首重緝私等語淮南鹽務全在漢岸疏銷而湖廣各州縣均居腹地鄰私處處可通見當整頓淮鹺之際若仍前梟販橫行甚至姦商亦藉官鹽爲影射安望日有起色該處鹽務雖總歸兩江總督管轄而相隔旣遙有鞭長莫及之勢且緝私係地方文武應辦之事著湖廣總督湖北湖南各巡撫嚴飭鹽道督率所屬不分畛域協力查拏每

下清皇... 卷四
獲一起私鹽具詳咨部仍於一年期滿奏報銷引分數摺內
策覈以憑稽考如有查緝不力或始勤終怠之員卽著嚴參
毋得視爲具文以挽頽綱而懲積弊欽此

道光三十年四月十八日內閣奉

下諭前據給事中曹履泰奏請復根窩舊制又御史周炳鑑奏
稱淮南改票未可輕行各一摺當交陸建瀛體察情形悉心
妥議具奏茲據奏稱准鹺舊綱疲累已極若不變法萬難支
持並將該給事中等原奏各條逐層辨駁又片奏見在揚州
開局商民踴躍已西綱上半奏銷可以趕辦無誤等語淮南
鹽課帑項攸關該督綜理鹽務實力講求既經屏絕眾議必

係確有把握卽著責成陸建瀛統籌全局除弊興利總期於
國計民生均有裨益不致趕辦一二次奏銷後又形竭蹶方
爲不負委任欽此

道光三十年四月內閣奉

上諭據戶部覆覆大學士耆英條奏理財之要以地丁鹽課關
稅爲歲入之大端以兵餉河工爲歲出之大端得其弊之所
在認真革除害去而利自見著各直省督撫河道總督鹽政
各關監督查照該部指出各弊振刷精神實力剔除所有陋
規浮費全應禁革並將見在如何整頓積弊辦理之處據實
具奏欽此

道光三十年四月內閣奉

上諭戶部奏請飭各省於應解支各款不得率請改撥協濟等語近來各省於向有本款可支無待協濟者率請協濟於常年例用之項不應改撥者率請改撥而於該省積欠未完之款反延不催解支細日形實原於此嗣後著各直省督撫鹽政監督等於戶部指撥各款務須覈實籌解不得恃有成案率請改撥其本省應支之項卽偶有不敷亦當自行籌畫不得率請協濟其積欠未完之款必應破除情面上緊嚴催該督撫等如果視國事如家事斷無催徵罔效者至各省造送春秋二季撥冊每逾例限向由戶部隨摺附參嗣後著各該

部於每年二月八月到限之時查明撥冊未到省分專案參奏以重帑項而肅功令欽此

道光三十年六月初五日戶部奏遵議兩江總督陸建瀛條陳淮鹺新章未盡事宜奉

上諭立法雖極周備尤須任事之臣克己裕人方可令行禁止著兩江總督暨湖廣江西安徽江蘇各督撫各矢公忠照新定章程認真籌辦務使引暢課充以整鹺綱而收實效欽此
道光三十年十月十三日內閣奉

上諭陸建瀛奏鹽務新章試行有效等語淮南鹽務新章經陸建瀛督同聯英劉良駒等埽除積弊自開局至今五月有餘

已辦過上下兩半奏銷約十一月內外淮南全綱可清合之
淮北鹽課協餉計應共收銀五百餘萬兩辦理尙屬妥善陸
建瀛聯英劉良駒均著加恩交部議叙至楚西兩岸爲商販
行銷要地各該督撫務當飭屬一體督銷毋因新章初立稍
存畛域如果認真妥辦日有成效朕必加以鼓勵儻藉詞觀
望致令滯銷責有攸歸勿謂能逃朕鑒也欽此

道光三十年十一月十五日內閣奉

上諭前據裕泰等奏武昌府同知勞光泰議論離務新章其子
率行刊刷當降旨將勞光泰嚴加議處並令陸建瀛查明該
員所論係何意見據實具奏茲據陸建瀛奏該同知投遞稟

函並作有移岸三論見在板雖銷毀而散布已多深恐商販見而裹足等語淮南鹽務新章甫有成效豈可任不肖委員散播浮言阻撓挾制著裕泰派員將勞光泰解往江南交陸建瀛督同運司劉良駒嚴行審訊務將摺內所指各情逐一研鞫據實具奏毋稍含混當此整頓鹺務之時銷岸暢行方收實效裕泰總制楚疆自當不分畛域協力疏銷著卽督同該鹽道認真辦理一面嚴密查訪如有似此播散浮言者卽行拏究按律懲辦斷不可稍有徇隱以除積習而杜弊端欽此

道光三十年十二月十七日軍機大臣等奉

上諭裕泰龔裕奏楚岸辦理鹽務情形等語准飭引地以兩湖爲最廣惟湖北之宜昌襄陽湖南之衡永寶慶向因淮鹽成本過重積不能銷遂爲鄰私侵灌之地自須設法分銷據稱江省見擬將鹽包交鹽道轉發已據該道議詳宜昌衡州二府仍令通判赴省領運襄陽則擬令樊城商棧認運各商照前辦理或照運宜章程改爲官運各情著陸建瀛量其時地所宜乘此鹽價平減應如何使官鹽源源接濟不致私鹽仍前侵占引地官吏人等又添浮費立法之初必期周密毋令日久更蹈積習至所稱江省應嚴查夾帶一節自屬喫緊要務該督院必防制周詳其悉心籌計妥議具奏欽此

兩淮鹽法志卷四